

Sejahtera MADANI bukan sekadar basmi kemiskinan



Oleh Prof Dr Zaid Ahmad
bhrencana@bh.com.my

Di bawah kepimpinan Datuk Seri Anwar Ibrahim, kerajaan memacu satu pendekatan holistik dan penuh kesungguhan bagi memangkas kemiskinan melalui pelancaran Inisiatif Kesejahteraan Rakyat Malaysia MADANI (Sejahtera MADANI).

Program ini satu inisiatif nasional diselenggarakan Unit Penyelarasan Pelaksanaan (ICU), Jabatan Perdana Menteri (JPM) dan menyasarkan keluarga miskin dan miskin tegar berdaftar dalam Sistem eKasih.

Ia menghimpunkan pelbagai bentuk bantuan dan intervensi rentas kementerian, agensi kerajaan, badan korporat dan pertubuhan masyarakat sivil.

Diluncurkan Khamis lalu, Sejahtera MADANI menyaksikan satu sambutan luar biasa daripada sektor swasta. Perdana Menteri sendiri mengakui beliau pada mulanya hanya mengharapkan sumbangan sekitar RM50 juta, namun ternyata sambutan daripada korporat melepasi jangkaan sehingga mencecah RM120 juta.

Jumlah ini bukan sahaja mencerminkan keprihatinan sektor korporat terhadap isu kemiskinan, malah membuktikan keyakinan tinggi mereka terhadap keikhlasan, tatakelola dan ketelusan kerajaan menguruskan inisiatif ini.

Sebanyak 38 syarikat dan yayasan korporat tampil menyumbang kepada Tabung Kesejahteraan Rakyat. Antara penyumbang utama ialah Weststar Group dengan sumbangan sebanyak RM15 juta.

Beberapa syarikat gergasi lain turut memberikan sumbangan masing-masing sebanyak RM10 juta, antaranya YTL Corporation Berhad, Berjaya Corporation Berhad, MMC Corporation Berhad, Genting Berhad, DRB-Hicom Berhad, dan Trade-winds Group (Malaysia) Sdn Bhd dan Yayasan Al-Bukhary.

Sapura Secured Technologies menyumbang sebanyak RM3 juta, manakala Yayasan Pembangunan Ekonomi Islam Malaysia (YaPEIM) menyumbang sebanyak RM2.61 juta.

Syarikat lain seperti Malaysia Resources Corporation Berhad (MRCB), Peninsular Medical Sdn Bhd, Yinson Holdings Berhad, WCT Berhad, Westports Malaysia Sdn Bhd, Pavillion Real Estate Investment Trust, NAZA Corporation Holding Sdn Bhd, SP Setia Sdn Bhd, dan Tenaga Nasional Berhad (TNB) masing-masing memberi sumbangan sebanyak RM1 juta.

Selain itu terdapat 15 syarikat memberikan sumbangan bernilai antara RM100,000 hingga RM500,000.

Selain sumbangan kewangan, beberapa syarikat menyumbang melalui program intervensi sosial lebih berfokus dan lestari. Telekom Malaysia Berhad (TM) menyalurkan program keusahawanan digital bernilai RM10 juta; Grab Malaysia melaksanakan inisiatif pemerikasaan ekonomi bernilai RM5 juta; Prudential BSN Takaful Berhad menyumbang melalui program Microtakaful Jariah (MTJ) sebanyak RM3 juta.

Ini mencerminkan pembabitan menyeluruh sektor korporat dalam memacu agenda pembangunan sosial bersama kerajaan.

Sejahtera MADANI dirangka berdasarkan pendekatan menyeluruh negara atau 'Whole-of-Nation Approach' dan dilaksanakan dengan kerjasama sepenuhnya kementerian utama.

Kementerian terbabit termasuk Kementerian Ekonomi, Kementerian Kewangan, Kementerian Sumber Manusia, Kementerian Pembangunan Wanita,

Keluarga dan Masyarakat, Kementerian Pembangunan Usahawan dan Koperasi.

Kementerian Belia dan Sukan, Kementerian Kemajuan Desa dan Wilayah, Kementerian Pendidikan Malaysia, Kementerian Pendidikan Tinggi, dan Kementerian Perumahan dan Kerajaan Tempatan.

Bantuan bersasar lebih berkesan

Kerjasama erat antara kementerian ini membolehkan pelaksanaan bantuan bersasar lebih berkesan dan berimpak tinggi kepada kumpulan sasar.

Teras utama Sejahtera MADANI berpaksikan kepada empat kluster bantuan utama iaitu peningkatan pendapatan, pendidikan, perumahan dan kebajikan.

Dari segi peningkatan pendapatan, program ini menawarkan bantuan modal dan peralatan untuk memulakan perniagaan kecil, latihan kemahiran meningkatkan kebolehpasaran, padanan pekerjaan serta program pembangunan keusahawanan mikro dan komuniti.

Dalam aspek pendidikan, anak daripada keluarga eKasih dibantu melalui kelas tambahan percuma, sokongan barangan asas persekolahan dan bantuan kewangan melanjutkan pengajian ke peringkat tinggi.

Bagi aspek perumahan, bantuan disalurkan dalam bentuk baik pulih rumah usang/tidak selamat, pembinaan rumah baharu, penyambungan bekalan air dan elektrik serta bantuan kos sewa rumah bagi mereka yang kehilangan tempat tinggal.

Dalam kluster kebajikan pula, Sejahtera MADANI menyediakan bantuan sekali beri seperti peralatan kesihatan, makanan asas dan barangan keperluan segera.

Manfaat daripada pelaksanaan Sejahtera MADANI akan dirasakan oleh keluarga miskin dan miskin tegar melalui peningkatan taraf hidup keluarga miskin/miskin tegar melalui bantuan bersasar, peluang menyertai program pendidikan, latihan kemahiran, bantuan perumahan dan keusahawanan serta akses kepada peluang pekerjaan dan kesihatan yang lebih baik.

Ia juga memberi ruang kepada syarikat untuk melaksanakan tanggungjawab sosial korporat (CSR) secara berimpak tinggi dan terancang, menjadi rakan strategik kerajaan membantu masyarakat serta meningkatkan reputasi dan pembabitian komuniti syarikat melalui projek berimpak sosial.

Mereka akan mendapat manfaat pengecualian cukai pendapatan di bawah Subseksyen 44(6), Akta Cukai Pendapatan 1967, sekali gus mendorong lebih ramai penyertaan korporat membina negara sejahtera.

Pelaksanaan Sejahtera MADANI dijangka mampu mengeluarkan keluarga miskin daripada perangkap kemiskinan melalui pemerikasaan ekonomi dan bantuan bersasar.

Ia juga akan mengurangkan ketidakseimbangan dalam akses pendidikan, pekerjaan dan perumahan, serta mewujudkan ekosistem sosial inklusif dan mampan.

Ragam

Oleh: Deen

